

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. जम्मू कश्मीर विधानसभा च अज्ज उपराज्यपाल हुंदे अभिभाषण दे धन्नबाद प्रस्ताह पर चर्चा होग।
2. बजट इजलास दे शुरू होने पर मुख्यमंत्री उमर अब्दुल्ला होरें सब्बनें गी सदन च सकारात्मक ते बामतलब कारवाई च सैहयोग देने लेई आखेआ ऐ।
3. भारत नै संयुक्त राष्ट्र मानवाधिकार अध्यक्ष आस्सेआ जम्मू कश्मीर बारे टिप्पणी दी सख्त नुस्खाचीनी करदे होई खारज कीता ते आखेआ जे जम्मू कश्मीर तरक्की, रमानदारी ते खुशहाली बक्खी अगड़े बधै करदा ऐ।
4. उमर अब्दुल्ला होरें 9 मार्च गी शुरू होआ'रदी खेलो इंडिया स्यालु खेड्डें दी वैबसाईट लांच कीती।
5. रामबन जिले च परतियै ल्हास पस्सियां पौने दे बाद जम्मू कश्मीर राष्ट्रीय जरनैली शिडक गड्डिडएं दी आओजाई लेई बंद।

<><><><><><>

JKLA Proceesings

जम्मू कश्मीर विधानसभा दे बजट इजलास दे अज्ज दूआ ध्याड़ा ऐ जेह्दे च केई महत्वपूर्ण मुद्दे पर चर्चा दी मेद ऐ। विधानसभा दे मिंबर चर्चा च शामिल सुआलें दा परता देंगन। एह्दे इलावा अज्ज उपराज्यपाल हुंदे अभिभाषण पर धन्नबाद प्रस्ताह चर्चा बी होनी तैह ऐ। मुबारक गुल होर प्रस्ताह गी सदन च रखगंन ते कल इजलास दे शुरू होने पर दित्ते गेदे उपराज्यपाल हुंदे अभिभाषण पर विधानसभा दी तरफा अभार प्रगट करगंन। गुलाम अहमद मीर होर प्रस्ताह दा समर्थन करगंन जेह्दे बाद एह्दे पर चर्चा शुरू होग। प्रस्ताह पर तरमीमें बारे बी सोच बचार कीता जाग जेह्दा जे विधानसभा दी कारवाई गी अगड़े बधाने बक्खी इक महत्वपूर्ण कदम होंदा ऐ।

<><><><><><>

CM Budget

जम्मू कश्मीर विधानसभा दे इक म्हीना चलने आले बजट सत्र दी कल शुरूआत होआ। मुख्यमंत्री उमर अब्दुल्ला होरें सब्बने मिंबरें गी लोकें गी प्रभावत करने आले मुद्दे गी पुट्टने उप्पर महत्व देने लेई गलाया। उनें इस गल्ला उप्पर जोर पाया जे एह सत्र मिंबरें लेई लोकें दी मुद्दे गी पंछानन, लोकतंत्र गी मजबूत करने ते असरदार प्रतिनिधत्व गी जकीनी बनाने दा मौका देग। उनें गलाया जे बामतलब सत्र नां छड़ा लोकें दिए

जरूरतें ते परेशानिएं दा हल करी सकोग सगुआं खित्ते दे विकास लेइ लोड़चदे फैसले लैने ते लोकतंत्र गी होर मजबूत करने च बी असरदार साबत होग।

<><><><><><>

UN-Chief Remarks J&K

भारत नै संयुक्त राष्ट्र मानवाधिकार प्रमुख वोल्कर तुर्क हुंदे आस्सेआ अपनी सलाना समीक्षा अपडेट च जम्मू कश्मीर ते मणिपुर बारे कीती गेदी टिप्पणी गी सिरें थमां खारज करी दित्ता ऐ। जिनेवा च तुर्क हुंदे ब्यान पर प्रतिक्रिया दिंदे होई संयुक्त राष्ट्र च भारत दे स्थाई प्रतिनिधि अरिंदम बागची होरें, इनें गी बेबुनियाद करार दिंदे होई इंदी सख्त निंदेया कीती ते आखेआ जे जम्मू कश्मीर च तेजिया कन्नै रमानदारी ते खुशहाली बक्खी उबड़ा बधै करदा ऐ, हालिया चुनाएं च लोकें बधी चढ़ियै हिस्सा लैता ऐ। सैलसफा उत्थें नमिएं उंचाइएं गी छूआ करदी ऐ ते तेजिया कन्नै विकास होआ करदा ऐ। बागची होरें आखेआ जे तुर्क होरें अपने ब्यानै च छड़ा “कश्मीर” शब्द दा इस्तेमाल कीता ऐ जिसलै जे प्रदेश दा पूरा नां “जम्मू कश्मीर” ऐ। उनें संयुक्त राष्ट्र गी आखेआ जे ओ इक व्यापक ते संतुलित बचार आलारौह अपनाइयै कम्म करै। उनें आखेआ जे तुर्क होरें दुनिया च चलै करदे केई तनाजे दा जिक्र कीता जिंदे च यूक्रेन ते गजा बी शामिल हे, पर एहदे च पाकिस्तान दा कोई जिक्र नेई हा। उनें आखेआ जे इस अपडेट च तत्थें ते हालात दा मनमाने ढंगै नै इस्तेमाल कीता गेदा ऐ।

<><><><><><>

ECI-CS

भारतीय चुनां आयोग नै जम्मू कश्मीर व 18मीं लोकसभा दे चुनां पूरी चाल्ली रमानदारी ते कामयाबी कन्नै करोआने च जम्मू कश्मीर दे मुख सचिव अटल डुल्लू हुंदे कुशल नेतृत्व लेई उनेंगी सम्मानत कीता ऐ। इस सिलसिले च उनें शानदार नेतृत्व दा प्रमाण पत्र “सर्टिफिकेट ऑफ एग्जेम्पलरी लीडरशिप” दित्ता गेआ ऐ। ध्यानलोग ऐ जे जम्मू कश्मीर 1989 दे बाद लोकसभा चुनाएं च अजें तोड़ी दा सब्बने शा मता 58.11 प्रतिशत मतदान दर्ज कीता गेआ ऐ। इनें चुनाएं च 87 लक्ख कोला मते योग्य मतदाता हे जिंदे लेई 11 ज्हार 629 मतदान केन्द्र बनाए गेदे हे। 2019 च जम्मू कश्मीर रियासत गी केन्द्र शासत प्रदेश बनाए जाने दे बाद इत्थें पैहली बारी चुनां करोआए गे हे। जिंदे प्रबंधन ते तालमेल च सैह्योग लेई उनेंगी सम्मानत कीता गेआ ऐ।

<><><><><><>

ECI Confrence

भारतीय चुनां आयोग अज्जै थमां नमीं दिल्ली दे चुनां प्रबंधन सरबंधी “इंडिया इंटरनेशनल इंस्टीच्यूट ऑफ डेमोक्रेसी एंड इलेक्शन मैनेजमेंट” च सब्बने राज्यें ते केन्द्र शासत प्रदेशें दे मुख चुनां अधिकारिएं दे अज्जै थमां शुरू होआरदे दऊं रोजा सम्मेलन दी मेजबानी करोग। ज्ञानेश्वर कुमार हुंदे मुख चुनां आयुक्त बनने दे

बाद इस चाल्ली दा आयोजन पैहली बारी होआ करदा ऐ। इस सम्मेलन च सब्बने चुनां अधिकारिणं गी इक दुए कन्नै गल्लबात करने, अपने बचार ते तर्जुबे सांझे करने दा शानदार मौका थ्होग।

<><><><><><>

Khelo India Winter Games

मुख्यमंत्री उमर अब्दुल्ला होरें कल सिविन सचिवालय जम्मू च खेलो इंडिया विंटर गेम्स-2025 Kwig-2025.com दी अधिकारिक वैबसाईट दी शुरूआत कीती। एह आयोजन हुन 9 शा 15 मार्च तगर गुलमर्ग च होग, जेहदे च अल्पाइल स्काइंग, स्काई माओनटेनरिंग, स्नो बोर्डिंग ते नोर्डिक स्काइंग शामिल होग जेड़ियां कोंगदूरी ते गुनमर्ग क्लब च होंगन। मुख्यमंत्री होरें आयोजकें गी मुबारकबाद दित्ती। आयोजन दी पूरी बवस्था बारे जानकारी हासल कीती। नमीं पेश कीती दी वैबसाईट स्यालू खेड्डें सरबंधी व्यापक जानकारी प्रदान करोग। घट्ट बर्फबारी होने करी इनें स्यालू खेड्डें गी फरवरी शा अगड़ा पाना पेआ हा। पर हुन जम्मू कश्मीर च बर्फबारी होने करी खेलो इंडिया विंटर गेम्स-2025 दी शानदार शुरूआत होआ'रदी ऐ। साढ़े संवाददाता कन्नै गल्ल करदे होई बारामुला दे डिप्टी कमीशनर मिंगा शेरपा होरें गलाया।

<><><><><><>

Dy. CM Healthcare

उपमुख्यमंत्री सुरिन्दर चौधरी होरें अपनी सरकार दी जम्मू कश्मीर दे मजूदा सेहत सुविधाएं च होर बाद्धा करने दी वचनबद्धता गी इक बारी परतियै पक्का करदे होई होइ गलाया ऐ जे उच्च म्यार दी सेहत सहूलतां सब्बने लोकें ते चेचा करी ग्रामीण ते दूर दराज इलाकें च रौहने आले लोकें तगर पजाइयां जा8रदियां न। उपमुख्यमंत्री होरें एह गल्ल नौशेहरा दे उप-जिला अस्पताल दे कम्में कारवाइएं दा जायजा लैने लेई लोआई दी रोगी कल्याण समिति दी बैठक दरान अधिकारिणं गी संबोधत करदे होई आक्खी। इस मौके उपमुख्यमंत्री होरें जेह्दे जे रोगी कल्याण समिति दे प्रधान बी हैन, उनें नौशेहरा उप-जिला अस्पताल दे कम्में कारवाइएं दी सराहना कीती।

<><><><><><>

Div.Com Health Camp

जम्मू दे डिवीजनल कमीशनर रमेश कुमार होरें औंदे अप्रैल म्हीने “डोडा ते किश्तवाड़” च लगने आले इक बड्डे सेहत कैप लेई तैआरिणं ते बंदोबस्तें बारे चर्चा करने लेई कल इक बैठक सददी। रोटरी इंटरनैशनल आस्सेआ लोआए जा करदे इस कैप च मुफ्त सेहत तांच, अप्रेशन ते दोआइएं बगैरा दी सुविधा उपलब्ध होग। एह कैप इनें दौनें जिलें दे कमजोर तबकें दे लोकें लेई आयोजित कीता जा'रदा ऐ। बैठका च जिला अधिकारी, सेहत प्रतिनिधि, रोटरी इंटरनैशनल दे प्रतिनिधिणं शिरकत कीती ते एहदे लेई तैआरिणं ते एहदे प्रचार बारे

सलाह सूत्र कीता। डिवीजनल कमीशनर होरें सरबंघत अधिकारिणं गी इस कैप थमां लाह ठोआने लेई लाभार्थिणं दी शनाख्त करने दे निर्देश दित्ता, टकोहदा करियै दूर दरेड़े इलाकें थमां हफता भर चलने आले इस कैप च मरीजें गी आम ते माहिरानाडाक्टरी सेवा उपलब्ध कराइयां जांगन। एह कैप अप्रैल दी दुए हफते लोआया जाग।

<><><><><><>

Highway

भारी बरखा करी रामबन दे मेहाद इलाके च ल्हास पस्सियां पौने करी जम्मू श्रीनगर राष्ट्रीय जरनैली शिड़क एनएच-44 यातायात लेई बंद ऐ। लगातार बरखा पौने करी शिड़क दी सफाई दा कम्म बी मुकम्मल नेई होई सकेआ। रामबन ट्रैफिक पुलस विभाग नै यात्रुणं गी मौसम च सुधार होने ते शिड़क दे साफ होने थमां पैहले इत्त बक्खी बेवजह यात्रा नेई करने दी सलाह जारी कीती ऐ।

<><><><><><>

Annoncement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>